



Sumáriu Kazu
Tribunál Distritál Baucau
Edisaun Juñu 2018

Afirmasaun: Sumáriu Kazu tuir mai ne'e deskreve faktu sira no prosesu iha Tribunál tuir JSMP nia monitorizasaun independente, no deklarasaun ne'ebé parte sira fó iha Tribunál nia laran. Informasaun ne'e la representa JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru feto no ema vulneravel. JSMP afirma la iha justifikasaun ba violénsia hasoru feto.

A. Sumáriu prosesu julgamentu kazu iha Tribunál Distritál Baucau

1. Totál kazu ne'ebé JSMP monitoriza: 30

Artigu	Tipu Kazu	Númeru
Artigu 145 (KP) & artigu 2, 3, no 35 letra (b) Lei Kontra Violénsia Doméstika (LKVD)	Ofensa ba integridade fízika simples ho natureza violénsia doméstika no tipu ilísitu sira kona-ba violénsia doméstika	14
Artigu 145 (KP)	Ofensa ba integridade fízika simples	4
Artigu 154 (KP)	Maus tratus ba kónjuje	3
Artigu 172 no 173 (KP)	Violasaun seksuál	1
Artigu 146 (KP)	Ofensa ba integridade fízika grave	1
Artigu 146 (KP) no artigu 20 (1) lei arma brankas	Ofensa ba integridade fízika grave no arma brankas	1

Artigu 145 (KP) no artigu 189 (KP)	Ofensa ba integridade fízika simples no intigasaun krime	1
Artigu 207 (KP)	Kondusaun sein karta	2
Artigu 157 (KP)	Ameasa	1
Artigu 258 (KP)	Danu simples	1
Artigu 138 (KP), artigu 23 no artigu 35 (KP)	Omisídiu ho forma tentada	1
Totál		30

2. Totál desizaun ne'ebé JSMP monitoriza: 24

Tipu desizaun	Númeru
Suspensaun ba prizaun nia ezekusaun (artigu 68 KP)	15
Pena multa (artigu 67 KP)	5
Omologa pedidu dezisténsia keixa	4
Totál	24

3. Totál kazu ne'ebé sei kontinua prosesu tuir JSMP nia monitorizasaun: 6

B. Deskripsaun sumáriu ba desizaun kazu sira ne'ebé JSMP monitoriza:

1. Krime ofensa ba integridade fízika simples ho natureza violénsia doméstika

Nú. Prosesu : 0038/17. VQSIC
Kompozisaun Tribunál : Singulár
Juis : Dr. Jose Goncalves
Prokuradór : Dra. Ivonia M. Guterres
Defeza : Dr. Jose M. Guterres
Tipu pena : Pena prizaun fulan 4 suspende ba tinan 1

Iha 1 Juñu 2018, Tribunál Distritál Baucau prezide julgamentu leitura sentensa ba krime ofensa ba integridade fizika simples ho natureza violénsia doméstika ne'ebé envolve arguidu APM hasoru nia feen, iha Distritu Viqueque.

Akuzasaun Prokuradór

Prokuradór akuza katak iha 27 Agostu 2017, tuku 18.00 kalan, arguidu lori paralon baku dala ida iha lezada nia kidan, baku dala ida iha lezada nia matan-fukun no rasta lezada nia fuuk bainhira lezada fila husi natar to'o iha uma haree lampu eletrisidade uma nian mate hela, no lezada fila fali ba natar hodi fó hatene arguidu. Aktu ne'e rezulta lezada sofre moras no bubu no lezada konsege ba halo tratamentu iha Sentru Saude Viqueque.

Prokuradór akuza arguidu kontra artigu 145 Kódigu Penál kona-ba krime ofensa ba integridade fizika simples ho nia moldura penal too tinan 3 ka multa no konjuga ho artigu 2, 3, 35 no artigu 36 Lei Kontra Violénsia Doméstika (LKVD).

Produsaun ba prova sira

Iha prosesu julgamentu arguidu konfesa faktus hotu iha akuzasaun, arguidu deklara katak primeiravés mai hatan iha tribunál, arrepende ona nia hahalok, diak malu ona ho lezada, no depoisde problema ne'e to'o agora la baku ona lezada.

Entretantu, lezada konfirma faktus hotu iha akuzasaun prokuradór katak arguidu lori paralon baku dala ida iha lezada nia kidan, baku dala ida iha lezada nia matan fukun no rasta lezada nia fuuk. Aleinde ne'e, lezada reforsa arguidu nia deklarasaun katak arguidu ho lezada diak malu ona.

Alegasaun finál

Prokuradór konsidera arguidu provadu kometa krime hasoru lezada bazeia ba deklarasaun arguidu nian no depoimentu hosi lezada. Tanba ne'e, atu prevene krime hanesan akontese tan iha futuru, prokuradór husu ba tribunál atu aplika pena prizaun tinan ida suspende ba tinan rua.

Enkuantu, defeza husu ba tribunál atu kondena arguidu ho pena ne'ebé justu tanba haree ba sirkunstánsia atenuante sira hanesan arguidu konfensa, arrepende ona nia hahalok no foin primeiravés mai hatan iha tribunál.

Desizaun

Depoisde avalia faktu hotu, tribunál prova katak arguidu komete duni krime tuir faktu sira iha akuzasaun. Bazeia ba prova sira ne'e, tribunál kondena arguidu ho pena prizaun fulan 4 suspende ba tinan 1.

2. Krime ofensa ba integridade fizika simples

Nú. Prosesu : 0027/17. VQOSU
Kompozisaun Tribunál : Singulár

Juis : Dr. Jose Goncalves
Prokuradór : Dra. Ivonia M. Guterres
Defeza : Dr. Jose M. Guterres
Tipu pena : Pena prizaun fulan 4 suspende ba tinan 1

Iha 1 Juñu 2018, Tribunál Distritál Baucau prezide julgamentu leitura sentensa ba krime ofensa ba integridade fizika simples ne'ebé envolve arguidu Domingos Freitas Segurado no arguidu Jose Freitas hasoru lezadu Mateus da Costa, iha Sub-distritu Osso Distritu Viqueque.

Akuzasaun Prokuradór

Prokuradór akuza katak iha 18 Outobru 2018, tuku 08.30 dader, iha areia Waibua-Ossu, lezadu ba taa ai-fuik besik iha kolam, arguidu sira mosu mai dehan ai ne'e arguidu sira mak kuda, nune'e arguidu sira ho lezadu diskute malu no arguidu Domingos kaer lezadu nia kakorok no riba lezadu ba rai no arguidu Jose Freitas sama dala ida iha lezadu nia kotuk laran.

Prokuradór akuza arguidu sira kontra artigu 145 Kódigu Penál kona-ba krime ofensa ba integridade fizika simples ho nia moldura penal too tinan 3 ka multa.

Produsaun ba prova sira

Iha prosesu julgamentu, arguidu sira konfesa totalmente ba faktus iha akuzasaun, arguidu sira deklarata katak arepende ona sira nia hahalok no foin primeiravés mai hatan iha tribunál. Arguidu sira tenta atu diak malu fali ho lezadu maibé lezadu mak lakohi.

Alegasaun finál

Prokuradór konsidera arguidu sira komete duni krime hasoru lezadu no konsidera mós sirkunstánsia atenuante sira hanesan arguidu sira konfesa no arrepente ona sira nia hahalok. Maibé atu evita no prevene arguidu sira repete tan krime hanesan iha futuru, husu ba tribunál atu kondena arguidu sira ho pena prizaun tinan 1 suspende ba tinan 3.

Enkuantu defeza subliña liután katak arguidu sira konfesa, arrepente ona sira nia hahalok no promete sei la komete tan krime hanesan hasoru membru família ka ema seluk iha futuru. Tanba ne'e husu ba tribunál fó-pena ne'ebé adekuaudu ba arguidu sira.

Desizaun

Depoizde avalia faktu sira hotu, tribunal konklui katak arguidu sira provadu komete krime hasoru lezadu. Bazeia ba prova sira ne'e, tribunál kondena arguidu sira ho pena prizaun fulan 4 suspende ba tinan 1.

3. Krime ameasa

Nú. Prosesu : 0008/17. MNLLA
Kompozisaun tribunál : Kolektivu
Juis : Dr. Afonso Carmona
Prokuradór : Dr. Luis H. Rangel da Cruz

Defeza : Dr. Antonio Fernandes
Tipu pena : Omologa pedidu dezisténsia keixa

Iha 4 Juñu 2018, Tribunál Distritál Baucau liuhosi Tribunál móvel iha Distritu Manatuto, prezide julgamentu tentativa konsiliaun ba krime ameasa ne'ebé envolve arguidu Felix Carvalho Fernandes hasoru Luis Soares nu'udar lezadu, iha Suku Hatu Laran, Sub-distritu Laleia, Distritu Manatuto.

Akuzasaun Prokuradór

Prokuradór akuza katak iha 5 Maiu 2015, tuku 12.00 meudia, lezadu ho nia oan mane hamutuk ho Manuel husi Dirasaun Terras no Propriedade ba sukat rai ne'ebé antes ne'e lezadu halo ba karau luhan. Arguidu halo impedimentu no dehan ba lezadu katak "*uluk ó nia aman hadau malu rai ho ha'u, agora ó hadau malu tan rai ho ha'u ó nia vida sei badak no ha'u sei oho tiha ó*". Arguidu nia lia-fuan ne'e rezulta lezadu sente tauk.

Prokuradór akuza arguidu kontra artigu 157 Kódigu Penál kona-ba krime ameasa ho moldura penal to'o tinan 1 ka multa.

Produsaun ba prova sira

Tanba kazu ne'e nu'udar krime semi públiku, bazeia ba artigu 262 Kódigu Prosesu Penál (KPP) kona-ba tentativa ba konsiliaun, antes tama ba julgamentu produsaun ba prova, juis husu atu halo tentativa konsiliaun ba arguidu no lezadu.

Iha prosesu konsiliaun ne'e, arguidu husu deskulpa ba lezadu tanba arguidu ho lezadu ho arguidu sei iha relasaun familia. Arguidu deklarata katak arrepende ona nia hahalok no promete sei la komete tan krime hanesan iha futuru. Lezadu konkorda ho pedidu ne'e no husu ba tribunál atu deziste ninia-keixa hasoru arguidu.

Alegasaun finál

Prokuradór no defeza apresia akordu dame ne'ebé parte rua deside ona no husu ba tribunál atu omologa prosesu ne'e.

Desizaun

Bazeia ba pedidu dezisténsia hosi lezadu no akordu dame entre parte sira, tribunál konklui prosesu ne'e no omologa akordu dame entre parte sira.

4. Kazu maus tratus ba kónjuje

Nú. Prosesu : 0015/17. MNLCL
Kompozisaun tribunál : Kolektivu
Juis : Dr. Afonso Carmona
: Dr. Jose Goncalves
: Dra. Ercilia de Jesus
Prokuradór : Dr. Luis H. Rangel da Cruz
Defeza : Dr. Antonio Fernandes
Tipu pena : Pena prizaun tinan 2 suspende ba tinan 2

Iha 5 Juñu 2017, Tribunál Distritál Baucau liuhosi Tribunál movél iha Distritu Manatuto prezide julgamentu leitura akordaun ba krime maus tratus ba kónjuje ne'ebé envolve arguidu BdC hasoru nia feen, iha Distritu Manatuto.

Akuzasaun Prokuradór

Prokuradór akuza katak iha 10 Outubru 2017, tuku 12.00 kalan, arguidu tuku dala ida iha lezada nia tilun-hun parte loos, kaer lezada nia fuuk rasta ba mai bainhira lezada toba dukur hela no arguidu ninia liman sikun kona iha lezada nia matan-fukun no lezada dehan arguidu katak se arguidu *lanu karik haree fatin toba tiha*. Arguidu kontinua tuku dala ida iha lezada nia kotuk laran no tebe dala rua iha lezada nia kotuk laran.

Iha fulan Juñu 2017, tuku 07.00 dader, arguidu tuku dala 2 iha lezada nia kotuk laran. Arguidu sempre halo agresau hasoru lezada, wainhira arguidu lanu.

Antes ne'e iha data ne'ebé la apura, maibé iha fulan Maiu 2017, tuku 07.00 dadeer arguidu basa dala ida iha lezada nia kanuruk. Liutiha semana rua iha fulan Maiu 2017, tuku 07.00 dadeer arguidu tuku dala rua iha lezada nia kotuk laran.

Prokuradór akuza arguidu kontra artigu 154 Kódigu Penál kona-ba krime maus tratus ba kónjuje no konjuga ho artigu 2, 3, 35 no artigu 36 LKVD.

Produsaun ba prova sira

Iha prosesu julgamentu arguidu konfesa totalmente ba faktus sira iha akuzasaun, arguidu deklarata katak arrepende ona nia hahalok no foin primeiravés mai hatan iha tribunál no diak malu ona ho lezada. Iha parte seluk, lezada mantein faktus sira iha akuzasaun no konfirma ho arguidu nia deklarasaun katak sira diak malu ona.

Alegasaun finál

Prokuradór mantein ninia akuzasaun tanba arguidu provadu komete krime hasoru lezada, bazeia ba konfisaun arguidu nian no deklarasaun hosi lezada. Mesmu nune'e, atu evita no prevene krime hanesan akontese tan iha futuru, husu ba tribunál aplika pena prizaun tinan rua suspende ba tinan tolu.

Enkuanu defeza husu ba tribunál atu kondena arguidu ho pena ne'ebé justu ho konsiderasaun sira katak arguidu konfesa, arrepende ona nia hahalok no foin primeiravés mai hatan iha tribunál.

Desizaun

Depoisde avalia faktu sira hotu, tribunál prova katak arguidu komete duni krime tuir faktu sira iha akuzasaun prokuradór nian no konsidera sirkunstánsia hotu-hotu hosi kazu ne'e, tribunál kondena arguidu ho pena prizaun tinan rua suspende ba tinan rua no selu mós kustu judisiál US\$30.00.

5. Krime ofensa ba integridade fizika simples

Nú. Prosesu : 0099/14.BCBCU

Kompozisaun Tribunál : Singulár
Juis : Dr. Jose C. Quintão
Prokuradór : Dr. Gustavo da Silva
Defeza : Dr. Marçal Jose Gama
Tipu pena : Omologa pedidu dezisténsia keixa

Iha 6 Juñu 2018, Tribunál Distritál Baucau prezide julgamentu tentativa konsiliaun ba krime ofensa ba integridade fizika simples ne'ebé envolve arguidu Joao da Costa Branco no Mario Marques Assis Belo hasoru lezadu Filomino da Costa Fatima, iha Distritu Baucau.

Akuzasaun Prokuradór

Prokuradór akuza katak iha 12 Setembru 2014, tuku 12.00 meudia, iha area rotunda Vila Antiga Baucau, lezadu lao hela atu ba hola sasan iha Loja Roman nian. Derepentí karreta mikrolet ho marka "Luz do Sol" mai para iha lezadu nia oin, hafoin arguidu Mario Marques Assis Belo tun husi kareta hodi tebe dala rua iha lezadu nia liman no tebe dala rua iha lezadu nia kabun. Enkuantu arguidu Joao da Costa Branco tebe lezadu maibé la kona, nune'e arguidu lori tudik sona dala ida iha lezadu nia kabaas parte karuk. Aktu ne'e rezulta lezadu sofre kanek, ran sai barak no lezadu monu ba rai.

Prokuradór akuza arguidu sira kontra artigu 145 Kódigu Penál kona-ba krime ofensa ba integridade fizika simples ho moldura penal too tinan 3 ka multa.

Produsaun ba prova

Tanba kazu ne'e nu'udar krime semi públiku, bazeia ba artigu 262 Kódigu Prosesu Penál (KPP) kona-ba tentativa ba konsiliaun, antes tama ba julgamentu produsaun ba prova, juis husu atu halo tentativa konsiliaun ba arguidu sira no lezadu.

Iha prosesu konsiliaun ne'e, arguidu sira husu deskulpa ba lezadu, arguidu sira deklara katak arrepende ona sira nia hahalok no promete sei la komete tan krime hanesan hasoru lezadu iha futuro. Lezadu konkorda ho pedidu ne'e no husu ba tribunál atu dezisté ninia-keixa hasoru arguidu sira.

Alegasaun final

Prokuradór no defeza apresia akordu dame ne'ebé parte rua decide ona no husu ba tribunál atu omologa prosesu ne'e.

Desizaun

Bazeia ba pedidu dezisténsia hosi lezadu no akordu dame hosi parte sira, Tribunál konklui prosesu ne'e no omologa akordu dame entre parte sira.

6. Krime ofensa ba integridade física grave no arma brankas

Nú. Prosesu : 0032/17. VQOSU
Kompozisaun Tribunál : Singulár
Juis : Dr. Jose Escurial
Dra. Ercilia de Jesus
Dr. Jose C. Quintão

Prokuradór : Dr. Domingos Goveia Barreto
Defeza : Dr. Jose M. Guterres
Tipu pena : Pena prizaun tinan 3 suspende ba tinan 1

Iha 5 Juñu 2018, Tribunál Distritál Baucau prezide julgamentu leitura akordaun ba krime ofensa ba integridade fizika grave no arma brankas ne'ebé envolve arguidu Alito da Costa hasoru nia alin lezadu Jeferino da Costa, iha Suku Uagia, Sub-distritu Ossu, Distritu Viqueque.

Akuzasaun Prokuradór

Prokurador akuza katak iha 31 Outubru 2017, tuku 18.00 lokraik, arguidu tunu karau kulit, nune'e arguidu husu ba nia inan Zulmira Ruas foti besi hodi arguidu tuku rahun karau kulit. Tanba ne'e lezadu dehan ba arguidu katak "*nusa mak ó lakohi hamrik ba foti de'it, maibé ó manda fali ferik*". Nune'e arguidu ho lezadu diskute malu no sira nia inan hakalma tiha sira no lezadu ba fali nia tiu nia uma. Derepente arguidu tuir ba lezadu lori ho diman no katana ho tolok atu taa iha lezadu nia ulun, maibé lezadu konsege defende-an no lori meja masa ki'ik hodi salva netik katana ne'e. Lezadu lori liman loos kaer arguidu nia faru gola no liman karuk kaer iha katana nia kroat no tenta atu foti katana hosi arguidu. Maibé arguidu rasta katana ne'e no rezulta lezadu nia liman laran kanek hotu no tenke ba halo tratamentu iha Sentru Saúde Viqueque no suku pontu 21.

Prokuradór akuza arguidu kontra artigu 146 Kódigu Penál kona-ba krime ofensa ba integridade fizika grave no konjuga no artigu 20 alinea (1) Lei Nú. 5/2017 kona-ba armas brankas.

Produsaun ba prova sira

Iha prosesu julgamentu, arguidu konfesa faktus hotu iha akuzasaun, arguidu deklara katak wainhira detein iha sela polisia, arguidu arrepende ona nia hahahalok, tanba hakanek lezadu ne'ebé nu'udar arguidu nia alin rasik, nune'e bainhira fila husi sela polisia arguidu husu kedas deskulpa ba lezadu no sira diak malu kedas. Arguidu mós deklara katak foin primeiravés mai hatan iha tribunál no promete sei la komete tan krime hanesan iha futuru. Iha parte seluk lezadu konfirma faktus hotu iha akuzasaun no depoisde akontesementu ne'e diak malu kedas ho arguidu no lezadu nia liman ne'ebé katana kona bele halo fali servisu hanesan bai-bain.

Alegasaun finál

Prokuradór husu ba tribunál atu kondena arguidu ho pena prizaun tinan tolu suspende ba tinan tolu tanba prokuradór prova katak arguidu komete duni krime tuir faktu sira iha akuzasaun. Pozisaun prokuradór ne'e bazeia ba lezadu nia deklarasaun ne'ebé kontinua reforsa faktu sira iha akuzasaun.

Enkuantu defeza husu ba tribunál atu konsidera sirkunstánsia atenuante sira hanesan; arguidu diak malu ona ho lezada, arrepende ona nia hahalok, foin primeiravés mai hatan iha tribunál no promete sei la komete tan krime hasoru lezadu iha futuru. Enkuantu akotesementu ne'e rasik la fó impaktu ba lezadu nia liman. Tanba ne'e husu ba tribunál halo alterasaun juridiku hosi krime ofensa ba integridade fizika grave ba fali krime ofensa ba integridade fizika simples.

Desizaun

Depoisde avalia faktus provadu sira ne'ebé produs durante julgamentu tribunal pova katak arguidu komete duni krime hasoru lezadu bazeia-ba faktu-sira iha akuzasaun prokuradór nian.

Tribunál konklui prosesu ne'e no kondena arguidu ho pena prizaun tinan tolu suspende ba tinan ida.

7. Krime ofensa ba integridade física grave

Nú. Prosesu	: 0451/12. PDBAU
Kompozisaun Tribunál	: Kolektivu
Juis	: Dr. Jose Goncalves : Dr. Afonso Carmona : Dra. Ercilia de Jesus
Prokuradór	: Dra. Ivonia M. Guterres
Defeza	: Dr. Grigorio de Lima
Tipu pena	: Pena prizaun tinan 2 suspende ba tinan 2

Iha 7 Juñu 2018, Tribunál Distritál Baucau prezide julgamentu leitura akordaun ba krime ofensa ba integridade fizika grave ne'ebé envolve arguidu Martinho Viana hasoru Francisco Viana, iha Suku Lavateri, Sub-distritu Baguia, Distritu Baucau.

Akuzasaun Prokuradór

Prokuradór akuza katak iha 13 Setembru 2012, tuku 15.00 lokraik, lezadu konverse hela ho Cipriano da Costa iha lezadu nia uma. Derepente arguidu mosu mai no sein razaun ne'ebé klaru arguidu lori katana taa lezadu nia liman parte karuk no rezulta lezadu sofre kanek no ran sai barak.

Prokuradór akuza arguidu kontra artigu 146 letra (b) Kódigu Penál kona-ba krime ofensa ba integridade fizika grave.

Produsaun ba prova sira

Iha prosesu julgamentu, arguidu konfesa integralmente ba faktus iha akuzasaun, arguidu deklarata katak iha akontesementu ne'e arguidu ho kondisaun lanu todan, nune'e arguidu la hatene tuir-an. Bainhira comunidade sira kaer tiha arguidu no to'o oin mós mak arguidu foin hatene katak, arguidu taa ona lezadu. Arguidu mós deklarata katak diak malu ona ho lezadu no problema ne'e rezolve ona tuir kultura Timor nian, no arguidu fó kuda 1 ho osan US\$60.00.

Aleinde ne'e, lezadu konfirma faktus hotu iha akuzasaun prokuradór nian, no lezadu mós deklarata katak depoisde akontesementu ne'e lezadu nia liman fuan rua ne'ebé arguidu taa la normal. Aleindé lezadu mós konfirma ho deklarasaun arguidu nian katak diak malu ona ho arguidu no kazu ne'e sira rezolve ona tuir kultura Timor nain.

Alegasaun finál

Prokuradór konsidera arguidu provadu komete krime ofensa ba integridade física grave tuir faktu sira iha akuzasaun. Tanba ne'e atu prevene krime hanesan akontese tan iha futuro, husu ba tribunál atu kondena arguidu ho pena prizaun tinan 2 suspende ba tinan 4.

Enkuantu defeza husu ba tribunál atu kondena arguidu ho pena ne'ebé adekuaudu ho konsiderasaun katak, arguidu konfesa no deklarata katak iha akontesementu ne'e arguidu ho kondisaun lanu todan no kazu ne'e sira rezolve ona tuir kultura Timor nian.

Desizaun

Depoisde avalia faktu sira hotu, tribunál prova katak arguidu komete duni krime tuir faktu sira iha akuzasaun prokuradór nian. Tribunál mós konsidera sirkunstánsia hotu-hotu ne'ebé asociadu hosi kazu ne'e no kondena arguidu ho pena prizaun tinan 2 suspende ba tinan 2.

8. Krime ofensa ba integridade fízika simples no instigasaun ba krime

Nú. Prosesu : 0025/17. PDBAU
Kompozisaun Tribunál : Singulár
Juis : Dra. Ersilia de Jesus
Prokuradór : Dr. Gustavo da Silva
Defeza : Dr. Americo Luis Freitas Belo
Tipu pena : Pena prizaun tinan 1 fulan 6 suspende ba tinan 2 ba arguidu AS no pena prizaun tinan 2 suspende ba tinan 2 ba arguidu MP

Iha 8 Juñu 2018, Tribunál Distritál Baucau prezide julgamentu leitura sentensa ba krime ofensa ba integridade fízika simples no instigasaun ba krime ne'ebé envolve arguidu Agostinho Soares no Miguel Perreira hasoru lezadu Jacinto de Fatima Soares, iha Suku Aitias, Sub-distritu Manatuto, Distritu Manatuto.

Akuzasaun Prokuradór

Prokuradór akuza katak iha 23 Janeiru 2017, tuku 21.00 kalan, iha kampu Alor Manatuto, lezadu reboka hela viziñu nia uma, derepenti arguidu Miguel Perreira ba hasoru lezadu no husu ba lezadu katak "*imi mak jagoan ka...?*" Tanba ne'e lezadu husu fila-fali ba arguidu Miguel Perreira katak "*se mak dehan ami jagoan?*" Maibé, lezadu ko'alia seidauk hotu, derepenti arguidu Agostinho Soares ho nia maluk sira tuda lezadu nia uma ho fatuk no konsege kona iha lezadu nia inus parte loos. Aktu ne'e rezulta lezadu sofre moras iha inus no ran sai barak no arguidu tenke ba halo tratamentu iha Sentru Saúde Matatuto.

Prokuradór akuza arguidu Agostinho Soares kontra artigu 145 Kódigu Penál kona-ba krime ofensa ba integridade fizika simples ho nia moldura penal to'o tinan 3 ka multa. Enkuantu ba arguidu Miguel Perreira prokuradór akuza kontra artigu 189 Kódigu Penál kona-ba intigasaun ba krime.

Produsaun ba prova sira

Iha prosesu julgamentu arguidu Agostinho Soares nega faktus hotu iha akuzasaun no deklarata katak iha akontesementu ne'e arguidu la tuda lezadu nia uma, tanba arguidu ho nia familia iha uma de'it. Enkuantu arguidu Miguel Perreira deklarata katak iha tuku 21.00 kalan arguidu fila hosi tasi ibun, rona lezadu toka muzika ho volume ne'ebé maka'as, nune'e arguidu ba fó hatene ba lezadu atu bele hatun volume halo neneik. Depoisde fó hatene tiha ba lezadu, arguidu mós fila ona uma. Derepente lezadu ho nia maluk sira lori fatuk tuda tuir arguidu, tanba ta'uk arguidu fila liu ba uma.

Iha parte seluk, lezadu konfirma faktus hotu iha akuzasaun no deklarata katak iha akontesementu

ne'e arguidu Miguel Perreira mak mai iha lezadu nia uma no husu ba lezadu katak "*imi mak jagoan iha ne'e ka...*?" Lezadu mós deklara katak arguidu Agostinho Soares mak lori fatuk tuda lezadu nia uma no tuda mós lezadu nia inus sorin-loos.

Testemuña Manuel Vicente nu'udar lezadu nia viziñu depoimenta katak primeiru arguidu sira mai tuda uluk lezadu nia uma leten no lakleur deit, arguidu Miguel mai hakilar katak "*imi mak jagoan iha ne'e ka...*?" no arguidu Agostinho Soares foti fatuk tuda uma no kona fali iha lezadu nia inus no rezulta kanek no ran sai barak.

Alegasaun final

Prokuradór konsidera arguidu sira koko bosok tribunál tanba nega faktu sira ne'e akuza ba sira. Mezmu nune'e lezadu konfirma no reforsa mós hosi testemuña ninia depoimentu. Tanba ne'e prokuradór mantein ninia akuzasaun no husu ba tribunál atu kondena arguidu sira tuir konviksaun tribunál nian no selu mós indemnizasaun sivil ba lezadu.

Enkuantu defeza haktuir katak arguidu sira deklara sira la komete aktu ne'ebé akuza hosi prokuradór, tanba iha akontesementu ne'e arguidu sira la ba lezadu nia uma. Tanba ne'e husu ba tribunál atu kondena arguidu sira tuir konviksaun tribunál nian.

Desizaun

Depoisde avalia faktus provadu sira ne'ebé produs durante julgamentu, tribunál konklui prosesu ne'e no kondena arguidu Agostino Soares ho pena prizaun tinan ida fulan fulan neen suspende ba tinan rua. Entretantu ba arguidu Miguel Perreira tribunál kondena ho pena prizaun tinan rua suspende ba tinan rua.

9. Krime ofensa ba integridade física simples ho natureza violénsia doméstika

Nú. Prosesu	: 0006/18.VQSIC
Kompozisaun Tribunál	: Singulár
Juis	: Dra. Ercilia de Jesus
Prokuradór	: Dra. Ivonia Maria Guterres
Defeza	: Dr. Jose M. Guterres
Tipu pena	: Pena prizaun tinan 1 suspende ba tinan 1

Iha 11 Juñu 2018, Tribunál Distritál Baucau prezide julgamentu leitura sentensa ba krime ofensa ba integridade física simples ho natureza violénsia doméstika ne'ebé envolve arguidu VPG hasoru nia feen, iha Distritu Viqueque.

Akuzasaun Prokuradór

Prokuradór akuza katak iha 28 Janeiru 2018, tuku 12.00 meudia, arguidu lori telefone tuda dala ida iha lezada nia ain no rezulta lezada sofre kanek no ran.

Prokuradór akuza arguidu kontra artigu 145 Kódigu Penál kona-ba krime ofensa ba integridade física simples ho nia moldura penal to'o tinan 3 ka multa no konjuga ho artigu 2, 3, 35 no artigu 36 LKVD.

Produsaun ba prova

Iha prosesu julgamentu arguidu konfesa faktus hotu iha akuzasaun, deklara katak hola malu durante tinan 30 ona foin primeiravés komete krime hasoru lezada. Arguidu mós deklara katak di'ak malu fali ho lezada, arrepende ona nia hahalok no promete sei la komete tan krime hanesan hasoru membru familia. Iha parte seluk lezada konfirma faktus hotu iha akuzasaun, lezada mós deklara katak diak malu ona ho arguidu.

Alegasaun finál

Prokuradór konsidera arguidu komete duni krime hasoru lezada no konsidera mós sirkunstánsia atenuante sira hanesan arguidu konfesa, arrepende ona nia hahalok no foin primeiravés komete krime. Maibé atu evita no prevene arguidu repete tan krime hanesan iha futuro, husu ba tribunál atu kondena arguidu ho pena multa.

Enkuantu defeza subliña liután katak arguidu konfesa, arrepende ona nia hahalok no diak malu ona ho lezada. Tanba ne'e husu ba Tribunál aplika pena multa ne'ebé adekuaudu ba arguidu.

Desizaun

Depoizde avalia faktu sira hotu, tribunál konklui katak arguidu provadu komete krime hasoru lezada. Bazeia ba prova sira ne'e, tribunál kondena arguidu ho pena prizaun fulan ida suspende ba tinan ida no selu kustu judisiál US\$10.00.

10. Krime ofensa ba integridade fízika simples ho natureza violénsia doméstika

Nú. Prosesu	: 0007/17. BCEVN
Kompozisaun Tribunál	: Singulár
Juis	: Dra. Ersilia de Jesus
Prokuradór	: Dr. Luis Hernani Rangel
Defeza	: Dr. Jose Maria Guterres
Tipu pena	: Pena prizaun fulan 6 suspende ba tinan 1

Iha 11 Juñu 2018, Tribunál Distritál Baucau prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu PdC hasoru nia feen, iha Distritu Baucau.

Akuzasaun Prokuradór

Prokuradór akuza katak iha 27 Maiu 2017, tuku 20.00 kalan, arguidu trata lezada no dehan katak “nusa ó la sai husi uma ne'e no ba hela iha ó nia inan-aman nia uma.” Lezada hatan ba arguidu katak “ha'u sei la sai husi uma ne'e”. Hafoin arguidu tolok lezada no kontinua haruka lezada atu sai hosi uma, nune'e lezada ko'us sira nia oan no sai duni husi uma. Arguidu duni-tuir lezada no rasta lezada fila ba uma, maibé lezada lakohi no arguidu tuku dala ida iha lezada nia matan fukun parte karuk, tebe dala ida iha lezada nia hirus matan no rezulta lezada monu ba rai. Aktu sira ne'e rezulta lezada sofre moras iha matan fukun no hirus matan.

Prokuradór akuza arguidu kontra artigu 145 Kódigu Penál kona-ba krime ofensa ba integridade fizika simples ho nia moldura penal too tinan 3 ka multa no konjuga ho artigu 2, 3, 35 no artigu 36 LKVD.

Produsaun ba prova sira

Iha prosesu julgamentu arguidu konfesa integralmente ba faktu sira iha akuzasaun prokuradór nian, arguidu deklara katak depoisode promblema ne'e arguidu ho lezada separa ona. Mesmu nune'e arguidu ho lezada diak malu ona, arguidu mós deklara katak arrepende ona nia hahalok.

Iha parte seluk lezada konfirma ho akuzasaun, lezada mós deklara katak diak malu ona ho arguidu, mesmu arguidu ho lezada separa ona, maibé arguidu nafatin tau matan ba sira nia oan.

Alegasaun finál

Prokuradór konsidera arguidu provadu komete krime violénsia doméstika hasoru lezada no konsidera mós sirkunstánsia atenuante sira hanesan arguidu konfesa no mesmu arguidu ho lezada separa ona. Mesmu nune'e, arguidu sei nafatin responsabiliza ba sira nia oan nain tolu. Bazeia konsiderasaun hirak ne'e husu ba tribunál atu kondena arguidu ho pena prizaun fulan neen no suspende ba tinan ida.

Enkuantu, defeza husu ba tribunál atu fó pena ne'ebé justu ba arguidu, tanba haree ba sirkunstánsia atenuante sira hanesan arguidu konfesa, arrepende ona nia hahalok. Mesmu separa ona ho lezada, maibé nafatin responsabiliza sira nia oan no diak malu ona ho lezada.

Desizaun

Depoisode avalia faktus provadu sira ne'ebé produs durante julgamentu tribunál konsidera akuzasaun prokuradór nian provadu hotu, no tribunál konklui prosesu ne'e no kondena arguidu ho pena prizaun fulan neen suspende ba tinan ida.

11. Krime ofensa ba integridade fízika simples ho natureza violénsia doméstika

Nú. Prosesu	: 0003/17. BCEVN
Kompozisaun Tribunál	: Singulár
Juis	: Dra. Ersilia de Jesus
Prokuradór	: Dra. Ivonia Maria Guterres
Defeza	: Dr. Marcal Gama
Tipu pena	: Pena prizaun fulan 6 suspende tinan 1

Iha 12 Juñu 2018, Tribunál Distritál Baucau prezide julgamentu leitura sentensa ba krime ofensa ba integridade fizika simples ho natureza violénsia doméstika ne'ebé envolve arguidu MdSB hasoru nia feen, iha Distritu Baucau.

Akuzasaun Prokuradór

Prokuradór akuza katak iha 26 Dezembru 2017, tuku 19.30 kalan, arguidu ho lezada diskute malu kona-ba lezada nia osan US\$1.00 ne'ebé arguidu foti no la fó hatene ba arguidu. Arguidu tuku dala rua iha lezada nia tilun parte karuk, tuku dala ida iha lezada nia hasan parte karuk no lori ai-pedasuk tuda tan lezada, maibé la konsege kona lezada.

Prokuradór akuza arguidu kontra artigu 145 Kódigu Penál kona-ba krime ofensa ba integridade fizika simples ho nia moldura penal too tinan 3 ka multa no konjuga ho artigu 2, 3, 35 no artigu 36 LKVD.

Produsaun ba prova sira

Iha prosesu julgamentu, arguidu konfesa faktus hotu iha akuzasaun, arguidu deklara katak foin primeiravés mai hatan iha tribunál, arrepende ona nia hahalok. Arguidu mós deklara katak hakarak moris hamutuk fali ho lezada, tanba depoisde problema ne'e moris separa ona ho lezada. Iha parte seluk lezada konfirma faktus hotu iha akuzasaun no deklara katak hakarak diak malu fali ho arguidu no moris hamutuk fali ho arguidu.

Alegasaun finál

Prokuradór haktuir katak bazeia ba konfisaun arguidu no deklarasaun lezada nian hatudu katak arguidu provadu komete krime hasoru lezada. Tanba ne'e prokuradór mantein ho akuzasaun no husu ba tribunál atu kondena arguidu ho pena prizaun fulan neen suspende ba tinan 2.

Entretantu, defeza husu ba tribunál atu fó pena ne'ebé justu ba arguidu tanba haree ba sirkunstánsia atenuante sira hanesan arguidu konfesa arrepende ona nia hahalok, kopera ho justisa no arguidu hakarak moris hamutuk fali ho lezada no lezada mós konkorda. Tanba ne'e husu ba tribunál aplika pena ne'ebé adekuadu ba arguidu.

Desizaun

Depoisde avalia faktu sira hotu, tribunál prova katak arguidu komete duni krime hanesan haktuir ona iha akuzasaun. Bazeia ba faktu provadu ne'e no tetu mós sirkunstánsia hotu tribunál konklui prosesu ne'e no kondena arguidu ho pena prizaun fulan neen suspende ba tinan ida no selu kustu judisiál US\$10.00.

12. Krime ofensa ba integridade fízika simples ho natureza violénsia doméstika

Nú. Prosesu	: 0033/18. BCBCv
Kompozisaun Tribunál	: Singulár
Juis	: Dr. Afonso Carmona
Prokuradór	: Dra. Ivonia Maria Guterres
Defeza	: Dr. Antonio Fernandes
Tipu pena	: Pena prizaun fulan 6 suspende tinan 1

Iha 14 Juñu 2018, Tribunál Distritál Baucau prezide julgamentu leitura sentensa ba krime ofensa ba integridade fizika simples ho natureza violénsia doméstika ne'ebé envolve arguidu LdCB hasoru nia feen, iha Distritu Baucau.

Akuzasaun Prokuradór

Prokuradór akuza katak iha 28 Feveireiru 2018, tuku 14.00 meudia, arguidu lori ai-pesaduk tuda lezada, maibé la kona, hafoin arguidu foti fatuk tuda tan lezada no kona iha lezada nia liman parte karuk. Antes akontesementu ne'e arguidu ho lezada diskute malu kona-ba lezada nia osan US\$3.00 ne'ebé arguidu foti ba sosa SDSB no la fó hatene lezada. Aktu ne'e rezulta lezada sofre moras no bubu iha liman.

Prokuradór akuza arguidu kontra artigu 145 Kódigu Penál kona-ba krime ofensa ba integridade fizika simples ho nia moldura penal too tinan 3 ka multa no konjuga ho artigu 2, 3, 35 no artigu 36 LKVD.

Produsaun ba prova sira

Iha prosesu julgamentu, arguidu konfesa faktu hotu iha akuzasaun, arguidu deklara katak arrepende ona nia hahalok, diak malu ona ho lezada no foin primeiravés mai hatan iha tribunál. Iha parte seluk lezada konfirma faktus hotu iha akuzasaun, lezada mós deklara katak diak malu ona ho arguidu.

Alegasaun finál

Prokuradór konsidera arguidu provadu komete krime hasoru lezada bazeia ba konfisaun arguidu nian no deklarasaun hosi lezada. Tanba ne'e husu ba tribunál kondena arguidu ho pena prizaun fulan 6 suspende ba tinan 1.

Enkuantu defeza husu ba tribunál atu kondena arguidu ho pena ne'ebé justu tanba haree ba sirkunstánsia atenuante sira hanesan arguidu konfesa, arrepende ona nia hahalok no foin primeiravés mai hatan iha tribunál. Tanba ne'e husu ba tribunál aplika pena ne'ebé justu ba arguidu.

Desizaun

Tribunál prova katak arguidu komete duni krime tuir faktu sira iha akuzasaun. Bazeia ba prova sira ne'e, tribunál konklui prosesu ne'e no kondena arguidu ho pena prizaun fulan neen suspende ba tinan ida.

13. Krime ofensa ba integridade fízika simples ho natureza violénsia doméstika

Nú. Prosesu	: 0032/18. BCBCV
Kompozisaun Tribunál	: Singulár
Juis	: Dr. Jose Goncalves
Prokuradór	: Dr. Luis H Rangel da Cruz
Defeza	: Dr. Grigorio de Lima
Tipu pena	: Pena prizaun fulan 6 suspende ba tinan 1

Iha 18 Juñu 2018, Tribunál Distritál Baucau prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu FdC hasoru nia feen, iha Distritu Baucau.

Akuzasaun Prokuradór

Prokuradór akuza katak iha 28 Feveireu 2018, tuku 09.00 dader, arguidu basa dala 2 iha lezada nia hasan parte loos no tebe dala 1 iha lezada nia kabun mamar no rezulta lezada monu ba rai.

Prokuradór akuza arguidu kontra artigu 145 Kódigu Penál kona-ba krime ofensa ba integridade fizika simples ho nia moldura penal to'o tinan 3 ka multa no konjuga ho artigu 2, 3, 35 no artigu 36 LKVD.

Produsaun ba prova sira

Iha prosesu julgamentu, arguidu konfesa faktu sira iha akuzasaun no deklarata katak wainhira tebe lezada monu tun ba rai, arguidu ta'uk no ko'us fali lezada no hamutuk ho familia sira lori lezada ba hospital. Polisia kaptura arguidu iha ospital no lori arguidu ba detein durante 24 oras iha sela polisia no arguidu diak malu kedas ho lezada wainhira fila hosi sela polisia. Arguidu mós deklarata katak foin primeiraveś mai hatan iha tribunál. Iha parte seluk lezada konfirma faktus hotu iha akuzasaun, lezada deklarata katak iha akontesementu ne'e arguidu mak ko'us lezada lori ba ospital no depoisde arguidu fila hosi eskuadra polisia sira diak malu kedas.

Alegasaun finál

Prokuradór konsidera arguidu provadu komete krime violénsia doméstika tuir faktu sira iha akuzasaun. Tanba ne'e, atu prevene krime hanesan la akontese tan iha futuru, prokuradór husu ba tribunál atu kondena arguidu ho pena prizaun fulan walu suspende ba tinan ida.

Enkuantu defeza husu ba tribunál atu kondena arguida ho pena ne'ebé adekuaudu tanba arguidu konfesa, arrepende ona nia hahalok no diak malu ona ho lezada no iha akontesementu ne'e arguidu mak lori lezada ba ospital, arguidu konsege detein iha eskuadra polisia no agora moris hamutuk hanesan feen ho laen.

Desizaun

Depoisde avalia faktu sira hotu, tribunál prova katak arguidu komete duni krime tuir faktu sira iha akuzasaun prokuradór nian no konsidera sirkunstánsia hotu-hotu hosi kazu ne'e. Hafoin tribunál konklui prosesu ne'e no kondena arguidu ho pena prizaun fulan neen suspende ba tinan ida.

14. Krime ofensa ba integridade fízika simples ho natureza violénsia doméstika

Nú. Prosesu	: 0003/18. BCBCV
Kompozisaun Tribunál	: Singulár
Juis	: Dr. Jose Goncalves
Prokuradór	: Dra. Ivonia M. Guterres
Defeza	: Dr. Marçal Gama
Tipu pena	: Pena multa

Iha 19 Juñu 2018, Tribunál Distritál Baucau prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu MP hasoru nia feen, iha Distritu Baucau.

Akuzasaun Prokuradór

Prokuradór akuza katak iha 22 Novembru 2017, tuku 20.30 kalan, arguidu tuku dala rua iha lezada nia reen-toos. Aktu ne'e rezulta lezada sofre moras no bubu iha lezada nia reen-toos.

Prokuradór akuza arguidu kontra artigu 145 Kódigu Penál kona-ba krime ofensa ba integridade fízika simples ho moldura penal too tinan 3 ka multa no konjuga ho artigu 2, 3, 35 no artigu 36 LKVD.

Produsaun ba prova sira

Iha prosesu julgamentu, arguidu konfesa faktus hotu iha akuzasaun, arguidu mós deklarata katak arrepende ona nia hahalok no promete sei la komete tan krime hanesan hasoru lezada iha futuru. Iha parte seluk lezada kontinua konfirma faktus iha akuzasaun no depoisde problema ne'e diak malu kedas ho arguidu.

Alegasaun finál

Prokuradór mantein akuzasaun tanba konsidera arguidu provadu komete krime hasoru lezada bazeia ba konfisaun arguidu nian no deklarasaun hosi lezada. Atu evita no prevene arguidu la komete tan krime hanesan iha futuru, husu ba tribunál aplika pena prizaun fulan neen suspende ba tinan ida.

Enkuantu, defeza husu ba tribunál atu kondena arguidu ho pena ne'ebé adekuaudu tanba hare ba sirkunstánsia atenuante sira hanesan arguidu konfesa, arrepende ona nia hahalok no promete sei la komete tan krime hanesan hasoru lezada iha futuru.

Desizaun

Tribunál prova katak arguidu komete duni krime tuir faktu sira iha akuzasaun. Bazeia ba prova sira ne'e, tribunál konklui prosesu ne'e no kondena arguidu ho pena multa US\$45.00 ne'ebé sei selu 0.50 sentavus kada loron durante loron 90 no selu kustu judisiál US\$10.00. Tribunál mós fiksa pena alternativa durante loron 60 prizaun, wainhira arguidu la kumpri pena multa refere.

15. Krime kondusaun sein karta

Nú. Prosesu	: 0047/17. LASTR
Kompozisaun Tribunál	: Singulár
Juis	: Dra. Ersilia De Jesus
Prokuradór	: Dr. Gustavo Da Silva
Defeza	: Dra. Maria Angela
Tipu pena	: Pena multa

Iha 20 Juñu 2018, Tribunál Distritál Baucau prezide julgamentu leitura sentensa ba krime kondusaun sein karta ne'ebé envolve arguidu Rogeiro Camoes hasoru Estadu RDTL, iha Sub-distritu Lautem, Distritu Lospalos.

Akuzasaun Prokuradór

Prokuradór akuza katak iha 16 Juñu 2017, tuku 11.00 dader, polisia tranzitu halo servisu operasaun hamutuk ho seksaun patrullamentu ba movimentasaun viaturas kareta no motor nian hanesan meius ba prevensaun asidente iha dalan publiku. Iha momentu ne'ebá arguidu ne'ebé kondus motorizada ho marka Honda Mega Pro ho Númeru: C.9523 TLS la tuir regras no kontra sinais tranzitu. Tanba ne'e polisia pasa revista no hetan katak arguidu laiha karta kondusaun.

Prokuradór akuza arguidu kontra artigu 207 Kódigu Penál kona-ba krime kondusaun sein karta ho nia moldura penal too tinan 2 ka multa.

Produsaun ba prova sira

Iha prosesu julgamentu, arguidu konfesa totalmente faktus iha akuzasaun, arguidu deklar katak arrepende ona nia hahalok, foin primeiravés mai hatan iha tribunál no deklar mós katak foin lori motor tinan ida.

Alegasaun finál

Prokuradór kosidera arguidu provadu komete krime kondusaun sein karta bazeia ba konfisaun arguidu nian. Maibé kosidera katak arguidu konfesa no foin primeiravés mai hatan iha tribunál ho konsiderasaun hirak ne'e, husu ba tribunál atu kondena arguidu tuir konviksaun tribunál nian.

Enkuantu, defesa husu ba tribunál atu aplika pena ne'ebé kmaan ba arguidu tanba kosidera sirkunstánsia atenuante sira hanesan arguidu konfesa no foin primeravés mai hatan iha tribunál.

Desizaun

Tribunál prova katak arguidu provadu komete krime kondusaun sein karta. Bazeia ba provas hirak ne'e tribunál konklui prosesu ne'e no kondena arguidu ho pena multa US\$45.00 ne'ebé sei selu 0.50 sentavus kada lora durante lora 90. Tribunál mós fiksa pena alternativa durante lora 60 prizaun, wainhira arguidu la kumpri pena multa refere.

16. Krime kondusaun sein karta

Nú. Prosesu	: 0029/18. BCSTR
Kompozisaun Tribunál	: Singulár
Juis	: Dr. Jose Quintao
Prokuradór	: Dr. Luis H. Rangel da Cruz
Defeza	: Dr. Jose M. Guterres
Tipu pena	: Pena multa

Iha 20 Juñu 2018, Tribunál Distritál Baucau prezide julgamentu leitura sentensa ba krime kondusaun sein karta ne'ebé envolve arguida Marcia Maria Ramos Viegas hasoru Estadu RDTL, iha Suku Tirilolo, Sub-distritu Baucau Vila, Distritu Baucau.

Akuzasaun Prokuradór

Prokuradór akuza katak iha 10 Feveiru 2018, tuku 10.00 dader, arguida kondus kareta Avanza iha dala publiku hosi Tirilolo atu ba Vila Nova to'o iha merkadu Vila Nova arguida soke motor. Wainhira polisia to'o iha fatin akontesementu hodi passa revista no hetan katak arguida laiha karta kondusaun.

Prokuradór akuza arguida kontra artigu 207 Kódigu Penál kona-ba krime kondusaun sein karta ho nia moldura penal too tinan 2 ka multa.

Produsaun ba prova sira

Durante julgamentu, arguida konfesa faktus hotu iha akuzasaun, arguida mós deklara katak foin primeiraveś mai hatan iha tribunál, arrepende ona nia hahalok. Arguida hatutan liután katak depoisde akontesementu ne'e trata ona karta kondusaun.

Alegasaun finál

Prokuradór haktuir katak arguidu konfesa faktus hotu iha akuzasaun, arguida loloos iha uluk karta kondusaun mak kondus kareta, maibé pela-kontrariu seidak iha karta kondusaun maibé arguida iha kondus ona kareta to'ó hetan asidente. Tanba ne'e husu ba tribunál aplika pena multa ba arguida.

Enkuantu defeza haktuir katak arguidu konfesa, arrepende ona nia hahalok, foin primeiraveś mai hatan iha tribunál no depoisde akontesementu ne'e arguida trata keda karta kondusaun. Tanba ne'e husu ba Tribunál aplika pena ne'ebé adekua ba arguida.

Desizaun

Depoisde avalia faktu sira hotu, tribunál prova katak arguidu komete duni krime tuir faktu sira iha akuzasaun prokuradór nian. Bazeia ba prova ne'e, tribunál konklui prosesu ne'e no kondena arguidu ho pena multa US\$15.00 ne'ebé sei selu 0.50 sentavus kada loron durante loron 30, no selu kustu judisiál US\$10.00. Tribunál mós fiksa pena alternativa durante loron 20 prizaun, wainhira arguidu la kumpri pena multa refere no aplika mós pena asesoria durante fulan neen arguidu la bele kondus kualker kareta.

17. Krime ofensa ba integridade fizika simples

Nú. Prosesu	: 0002/18. PDBAU
Kompozisaun Tribunál	: Singulár
Juis	: Dr. Hugo da Cruz Pui
Prokuradór	: Dr. Luis Hernani rangel
Defeza	: Dr. Jose Maria Guterres
Tipu pena	: Omologa pedidu dezisténsia keixa

Iha 20 Juñu 2018, Tribunál Distritál Baucau prezide julgamentu tentativa konsiliaun ba krime ofensa ba integridade fizika simples ne'ebé envolve arguidu Mateus da silva Ximenes hasoru lezadu Tito Freitas, iha Suku Loilobu, Sub-distritu Vemasse, Distritu Baucau.

Akuzasaun Prokuradór

Prokuradór akuza katak iha 05 Marsu 2018, tuku 13.00 meudia, arguidu tuku dala rua iha lezadu niaulun, rakut lezadu nia liman no hasan. Arguidu kontinua kaer iha lezadu nia faru gola no rasta lezadu. Aktu ne'e rezulta lezadu sofre moras no ran.

Prokuradór akuza arguidu kontra artigu 145 Kódigu Penál kona-ba krime ofensa ba integridade fizika simples ho moldura penal too tinan 3 ka multa.

Produsaun ba prova sira

Tanba kazu ne'e ho natureza krime semi públiku, bazeia ba artigu 262 Kódigu Prosesu Penál (KPP) kona-ba tentativa ba konsiliaun, antes tama ba julgamentu produsaun ba prova, juis husu atu halo tentativa konsiliaun ba arguidu no lezadu.

Iha prosesu konsiliaun ne'e, arguidu husu deskulpa ba lezadu, arguidu deklara katak arrepende ona nia hahalok no promete sei la komete tan krime hanesan iha futuru. Lezadu konkorda ho pedidu ne'e no husu ba tribunál atu dezisté ninia-keixa hasoru arguidu.

Alegasaun final

Prokuradór no Defeza apresia akordu dame ne'ebé parte rua deside ona no husu ba Tribunál atu omologa prosesu ne'e.

Desizaun

Bazeia ba pedidu dezisténsia hosi lezadu no akordu dame hosi parte sira, Tribunál konklui prosesu ne'e no omologa akordu dame entre parte sira.

18. Krime ofensa ba integridade fizika simples ho natureza violénsia doméstika

Nú. Prosesu	: 0029/17. BCBCV
Kompozisaun Tribunál	: Singulár
Juis	: Dr. Jose Escurial
Prokuradór	: Dr. Gustavo Agostu Morreira da Silva
Defeza	: Dr. Jose M. Guterres
Tipu pena	: Pena prizaun fulan 6 suspende ba tinan 1

Iha 21 Juñu 2018, Tribunál Distritál Baucau prezide julgamentu leitura sentensa ba krime ofensa ba integridade fizika simples ho natureza violénsia doméstika ne'ebé envolve arguidu JHdS hasoru nia feen, iha Distritu Baucau.

Akuzasaun Prokuradór

Prokuradór akuza katak iha 2 Maiu 2017, tuku 06.00 dader, arguidu ho lezada diskute malu kona-ba nesesidade uma laran nain, nune'e arguidu tebe dala ida iha lezada nia hirus matan, kaer lezada riba ba rai no basa dala ida iha lezada nia matan parte karuk.

Prokuradór akuza arguidu kontra artigu 145 Kódigu Penál kona-ba krime ofensa ba integridade fizika simples ho nia moldura penal too tinan 3 ka multa no konjuga ho artigu 2, 3, 35 no artigu 36 LKVD.

Produsaun ba prova sira

Durante julgamentu arguidu konfesa faktus hotu iha akuzasaun, arguidu deklara katak diak malu ona ho lezada, foin primeiravés mai hatan iha tribunál, arrepende ona nia hahalok. Iha parte seluk lezada konfirma faktus iha akuzasaun no deklara katak desde akontesementu ikus ne'e to'o agora arguidu la baku ona lezada.

Alegasaun finál

Prokuradór mantein akuzasaun tanba arguidu konfesa integralmente ba faktus sira iha akuzasaun no konfirma mós ho lezada nia deklarasaun. Tanba ne'e, atu evita no prevene krime hanesan akontese tan iha futuru, husu ba tribunál atu kondena arguidu tuir konviksaun tribunál nian.

Enkuantu defeza husus ba tribunál atu kondena arguidu ho pena ne'ebé adekua tanba haree ba sirkunstánsia atenuante sira hanesan arguidu konfesa, arrepende ona nia hahalok no foin primeiravés mai hatan iha tribunál.

Desizaun

Depoisode avalia faktu sira hotu ne'ebé prodús durante julgamentu, tribunál konklui katak arguidu provadu komete krime hasoru lezada. Bazeia ba faktus-provadás hirak-ne'e, tribunál kondena arguidu ho pena prizaun fulan neen suspende ba tinan ida.

19. Krime maus tratus ba kónjuje

Nú. Prosesu	: 0037/15.BCBCV
Kompozisaun Tribunál	: Kolekivu
Juis	: Dr. Jose Gonsalves Dr. Afonso Carmona Dr. Jose Escurial
Prokuradór	: Dr. Luis Hernani Rangel da Cruz
Defeza	: Dr. Sidonio M. Guterres
Tipu pena	: Pena prizaun tinan 2 suspende ba tinan 2

Iha 21 Juñu 2018, Tribunál Distritál Baucau prezide julgamentu leitura akordaun ba krime maus tratus ba kónjuje ne'ebé envolve arguidu AdC hasoru nia feen, iha Distritu Baucau.

Akuzasaun Prokuradór

Prokuradór akuza katak iha 23 Maiu 2015, tuku 10.00 dader, arguidu ho lezada diskute malu kona-ba fiu eletrisidade ne'ebé atu liga hosi uma laran ba uma fó-aluga nian. Hafoin arguidu tuku dala ida iha lezada nia kabaas iha parte karuk no soe sai lezada no labarik sira nian ropa hosi uma laran ba liur.

Aleinde ne'e, maisumenus iha tinan 2014, arguidu tuku dala barak iha lezada nia kotuk laran no rezulta lezada sofre moras no bubu.

Prokuradór akuza arguidu kontra artigu 154 Kódigu Penál kona-ba krime maus tratus ba kónjuje ho nia moldura penal too tinan 2 too tinan 6 konjuga ho artigu 2, 3, 35 no artigu 36 LKVD.

Produsaun ba prova sira

Iha prosesu julgamentu arguidu konfesa totalmente ba faktus iha akuzasaun no deklarasaun katak arrepende ona nia hahalok, foin primeiravés mai hatan iha tribunál no diak malu ona ho lezada no promete sei la komete tan krime hanesan hasoru lezada iha futuru. Iha parte seluk lezada kontinua konfirma faktus hotu iha akuzasaun no deklarasaun katak diak malu ona ho arguidu.

Alegasaun finál

Prokuradór kontinua mantein ninia akuzasaun tanba arguidu provadu komete krime hasoru lezada tuir saída mak parte sira deklara iha tribunál, bazeia ba konfisaun arguidu nian no deklarasaun hosi lezada. Ne'e-duni, atu prevene krime hanesan akontese tan iha futuro, husu ba tribunál atu kondena arguidu ho pena prizaun fulan tolu suspende ba tinan ida.

Defeza husu ba tribunál atu kondena arguidu ho pena ne'ebé kmaan ho konsiderasaun sira katak, arguidu konfesa arrende ona nia hahalok, foin primeiravés mai hatan iha tribunál diak malu ona ho lezada no moris hamutuk hanesan feen laen.

Desizaun

Depoizde avalia faktu sira hotu, tribunál konklui katak arguidu provadu komete krime hasoru lezada. Bazeia ba prova sira ne'e, tribunál kondena arguidu ho pena prizaun tinan rua suspende ba tinan rua.

20. Krime ofensa ba integridade física simples ho natureza violência doméstica

Nú. Prosesu	: 0040/16. PDBAU
Kompozisaun Tribunál	: Singulár
Juis	: Dr. Afonso Carmona
Prokuradór	: Dr. Luis H. Rangel da Cruz
Defeza	: Dr. Sidonio M. Sarmiento
Tipu pena	: Pena prizaun tinan 1 suspende ba tinan 2

Iha 22 Juñu 2018, Tribunál Distritál Baucau prezide julgamentu leitura sentensa ba krime ofensa ba integridade física simples ho natureza violência doméstica ne'ebé envolve arguidu JdSN hasoru feen, iha Distritu Baucau.

Akuzasaun Prokuradór

Prokuradór akuza katak iha 21 Maiu 2016, tuku 16.00 lokraik, arguidu ho lezada diskute malu no arguidu haruka lezada halot nia sasan atu sai hosi uma, nune'e lezada sai hosi uma ba toba iha familia nia uma. Iha dader lezada fila ba uma arguidu lori fatuk tuda dala ida iha lezada nia ain-tuur, no aktu ne'e rezulta lezada sofre moras no bubu.

Prokuradór akuza arguidu kontra artigu 145 Kódigu Penál kona-ba krime ofensa ba integridade física simples ho nia moldura penal too tinan 3 ka multa no konjuga ho artigu 2, 3, 35 no artigu 36 LKVD.

Produsaun ba prova sira

Durante julgamentu, arguidu konfesa faktus hotu iha akuzasaun, arguidu deklara katak wainhira lezada fila hosi PRADET arguidu husu deskulpa ba lezada no sira diak malu kedas. Arguidu hatutan liután katak arrende ona nia hahalok no promete sei la komete tan krime hanesan hasoru lezada iha futuro. Iha parte seluk lezada konfirma faktus hotu iha akuzasaun, diak malu ona ho arguidu, no deklara katak depoizde problema ne'e arguidu la baku ona lezada.

Alegasaun finál

Prokuradór konsidera arguidu provadu komete krime hasoru lezada bazeia ba konfisaun aguidu nian no deklarasaun hosi lezada. Tanba ne'e ba interesse atu halo prevensaun jerál no evita

arguidu repete tan hahalok hanesan iha futuru, husu ba tribunál atu aplika pena prizaun fulan neen suspende ba tinan ida.

Defeza husu ba tribunál atu kondena arguidu ho pena ne'ebé kmaan, tanba arguidu konfesa no arrepende ona nia hahalok, husu ona deskulpa ba lezada no promete sei la komete tan krime hanesan hasoru lezada iha futuru. Tanba ne'e husu ba tribunál aplika pena ne'ebé kmaan ba arguidu.

Desizaun

Tribunál prova katak arguidu komete duni krime tuir faktu sira iha akuzasaun. Bazeia ba prova sira ne'e, tribunál konklui prosesu ne'e no kondena arguidu ho pena prizaun tinan ida suspende ba tinan rua no selu kustu judisiál US\$20.00.

21. Krime danu simples

Nú. Prosesu	: 0017/17. BCLGA
Kompozisaun Tribunál	: Singulár
Juis	: Dr. Hugo da Cruz Pui
Prokuradór	: Dr. Gustavo Agostu Morreira da Silva
Defeza	: Dr. Antonio Fernades
Tipu pena	: Omologa pedidu dezisténsia keixa

Iha 27 Juñu 2018, Tribunál Distritál Baucau prezide julgamentu tentativa konsiliaun ba krime danu simples ne'ebé envolve arguidu Jose Marcal Vital hasoru lezada Carolina Ximene (nu'udar katekista Tekinomata) no lezadu Cipriano Ximenes (nu'udar Xefe Suku Tekinomata), iha Suku Tekinomata, Sub-distritu Laga, Distritu Baucau.

Akuzasaun Prokuradór

Prokuradór akuza katak iha 7 Novembru 2017, tuku 22.00 kalan, arguidu hasoru lezadu Cipriano Ximenes no amesa katak nia sei baku rahun tiha kapela no sede suku. Hafoin la kleur lezadu Cipriano Ximenes rona tarutu, no lezadu ba hare kapela nia odamatan ida aat no sede suku nia janela ida aat. Kazu ne'e akontese tanba sekretariu suku haruka arguidu ho maluk sira halo lista estrutura suku nian la tau iha sede suku, maibé ba tau fali iha xefe aldeia nia uma nune'e arguidu hirus.

Prokuradór akuza arguidu kontra artigu 258 Kódigu Penál kona-ba krime danu simples ho moldura penal too tinan 3 ka multa.

Produsaun ba prova sira

Tanba kazu ne'e nu'udar krime semi públiku, nune'e bazeia ba artigu 262 Kódigu Prosesu Penál (KPP) kona-ba tentativa ba konsiliaun, antes tama ba julgamentu produsaun ba prova, juis husu atu halo tentativa konsiliaun ba arguidu no lezadu.

Iha prosesu konsiliaun ne'e, arguidu deklara katak hadia fali ona sasan ne'ebé arguidu halo aat no kazu ne'e sira rezolve ona tuir tradisaun suku refere. Arguidu arrepende ona nia hahalok

no promete sei la komete tan krime hanesan iha futuru. Depoisde rona tiha arguidu nia deklarasaun, lezadu no lezada husu ba Tribunál atu dezisté sira ninia-keixa hasoru arguidu.

Alegasaun final

Prokuradór no defeza apresia akordu dame ne'ebé parte rua deside ona no husu ba tribunál atu omologa prosesu ne'e.

Desizaun

Bazeia ba pedidu dezisténsia hosi lezadu no lezada no akordu dame entre parte sira, tribunál konklui prosesu ne'e no omologa akordu dame entre parte sira.

22. Krime ofensa ba integridade fizika simples ho natureza violénsia doméstika

Nú. Prosesu	: 0016/15. MNNTB
Kompozisaun Tribunál	: Singular
Juis	: Dr. Jose Escurial
Prokuradór	: Dr. Domingos Goveia
Defeza	: Dra. Maria Angela
Tipu pena	: Pena multa

Iha 27 Juñu 2018 Tribunál Distritál Baucau prezide julgamentu leitura sentensa ba krime ofensa ba integridade fizika simples ho natureza violénsia doméstika ne'ebé envolve arguidu APM hasoru nia feen, iha Distritu Manatuto.

Akuzasaun Prokuradór

Prokuradór akuza katak iha data no fulan ne'ebé la apuradu, maibé iha tinan 2015, arguidu lori ai-sanak baku dala barak iha lezada nia ain to'o ai-sanak tohar no arguidu kontinua rasta lezada ba mai. Aktu ne'e rezulta lezada sofre moras no monu ba rai.

Prokuradór akuza arguidu kontra artigu 145 Kódigu Penál kona-ba krime ofensa ba integridade fizika simples ho nia moldura penal too tinan 3 ka multa no konjuga ho artigu 2, 3, 35 no artigu 36 LKVD.

Produsaun ba prova sira

Iha prosesu julgamentu arguidu konfesa faktus hotu iha akuzasaun, arguidu mós deklarata katak wainhira lezada fila hosi eskuadra polisia arguidu ho lezada diak malu fali. Arguidu deklarata katak arrepende ona nia hahalok no foin primeiravés mai hatan iha tribunál. Iha parte seluk lezada konfirma faktus hotu iha akuzasaun, diak malu ona ho arguidu.

Alegasaun final

Prokuradór konsidera krime ne'e akontese duni nune'e maske arguidu arrepende ona nia hahalok diak malu ona ho lezada, maibé prokuradór husu ba tribunál atu aplika pena prizaun fulan neen suspende ba tinan ida.

Defeza konkorda ho alegasaun prokuradór nian atu kondena arguidu ho pena prizaun fulan neen suspende ba tinan ida tanba konsidera katak, arguidu konfesa no arrepende ona nia hahalok no foin primeiraveés mai hatan iha tribunál no diak malu ona ho lezada.

Desizaun

Depoizde avalia faktu sira hotu, tribunál konkluui katak arguidu provadu komete krime hasoru lezada. Bazeia ba faktu provadu hirak ne'e, tribunál kondena arguidu ho pena multa US\$30.00 ne'ebé sei selu US\$1.00 kada loron durante loron 30 no selu kustu judisiál US\$10.00. Tribunál mós fiksa pena alternativa durante loron 20 prizaun, wainhira arguidu la kumpri pena multa refere.

23. Krime ofensa ba integridade fízika simples ho natureza violénsia doméstika

Nú. Prosesu	: 0064/18. BCBCV
Kompozisaun Tribunál	: Singulár
Juis	: Dr. Hugo Da Cruz Pui
Prokuradór	: Dr. Domingos Goveia Barreto
Defeza	: Dr. Jose Maria Guterres
Tipu pena	: Pena multa

Iha 28 Juñu 2018, Tribunál Distritál Baucau prezide julgamentu leitura sentensa ba krime ofensa ba integridade fizika simples ho natureza violénsia doméstika ne'ebé envolve arguidu JdCX hasoru nia feen MAM no oan-feto LRA, iha Distritu Baucau.

Akuzasaun Prokuradór

Prokuradór akuza katak iha 10 Abril 2018, tuku 21.00 kalan, arguidu fila husi Dili ho nia feen segundu no to'o uma arguidu dere odamatan. Hafoin lezada LRA ba loke odamatan no arguidu tama tiha ba uma laran, lezada LRA taka fali odamatan, arguidu dehan ba lezada LRA katak *‘ó la haree ema iha liur ka?’*,” Depoiz koalitia tiha hanesan ne'e lezada seidak hatan ba arguidu, maybe arguidu tebe kedas dala ida iha lezada LRA nia kidan parte karuk, no basa dala ida iha lezada LRA nia kanuruk no rezulta lezada monu ba rai.

Iha data no fulan ne'ebé la apuradu, maibé iha tinan 2013, arguidu uza korenti motor nian baku dala barak iha nia feen (MAM) nia kotuk laran. Aktu ne'e rezulta lezada sofre metan, bubu no kanek iha lezada nia kotuk laran.

Prokuradór akuza arguidu kontra artigu 145 Kódigu Penál kona-ba krime ofensa ba integridade fizika simples ho nia moldura penal too tinan 3 ka multa no konjuga ho artigu 2, 3, 35 no artigu 36 LKVD.

Produsaun ba prova sira

Durante julgamentu, arguidu konfesa faktus hotu ne'ebe prokuradór akuza ba arguidu, arguidu deklara katak diak malu ona ho lezada sira, foin primeiravés mai hatan iha tribunál, arrepende ona nia hahalok no promete sei la komete tan krime hanesan iha futuru.

Entertantu, lezada LRA no MAM konfirma faktus hotu iha akuzasaun no lezada sira mós deklara katak diak malu ona ho arguidu no moris hamutuk hanesan família ida deit.

Alegasaun finál

Prokuradór konsidera arguidu provadu komete krime hasoru lezada sira bazeia ba konfisaun arguidu nian no deklarasaun hosi lezada sira. Tanba ne'e husu ba tribunál kondena arguidu ho pena prizaun fulan 3 suspende ba tinan 1.

Defeza husu ba tribunál atu kondena arguidu ho pena ne'ebé adekuadu, tanba arguidu konfesa, arrepende ona nia hahalok, diak malu ona ho lezada sira no foin primeira-vez mai hatan iha Tribunál.

Desizaun

Depoizde avalia faktus provadu sira ne'ebé produs durante julgamentu, tribunál konklui prosesu ne'e no kondena arguidu ho pena multa US\$30.00 ne'ebé sei selu 0,50 sentavus kada loron durante loron 60 no kustu judisiál US\$10.00. Tribunal mós fiksa pena alternativa durante loron 20 prizaun. wainhira arguidu la kumpri pena multa refere.

24. Krime ofensa ba integridade física simples ho natureza violência doméstica

Nú. Prosesu	: 0020/18. BCSIC
Kompozisaun Tribunál	: Singulár
Juis	: Dr. Jose Escurial
Prokuradór	: Dr. Gustavo Da Silva
Defeza	: Dra. Maria Angela Fernandes
Tipu pena	: Pena prizaun fulan 3 suspende ba tinan 1

Iha 28 Juñu 2018, Tribunál Distritál Baucau prezide julgamentu leitura sentensa ba krime ofensa ba integridade física simples ho natureza violência doméstica ne'ebé envolve arguidu MNX hasoru nia feen, iha Distritu Baucau.

Akuzasaun Prokuradór

Prokuradór akuza katak iha 27 Abril 2018, tuku 12.00 meudia, arguidu ho lezada diskute malu kona-ba arguidu sai husi uma durante loron 3 foin fila ba uma. Iha momentu ne'ebá arguidu kaer hela katana atu ba to'os no lori katana nia belar baku dala ida iha lezada nia liman no kona iha lezada nia liman fuan rua no kaer lezada nia kanuruk no riba lezada ba rai. Aktu ne'e rezulta lezada nia liman fuan rua kanek no ran sai barak.

Prokuradór akuza arguidu kontra artigu 145 Kódigu Penál kona-ba krime ofensa ba integridade física simples ho nia moldura penal too tinan 3 ka multa no konjuga ho artigu 2, 3, 35 no artigu 36 LKVD.

Produsaun ba prova sira

Durante julgamentu arguidu konfesa faktus hotu iha akuzasaun no deklarata katak foin primeiravés mai hatan iha tribunál, arrepende ona nia hahalok no diak malu ona ho lezada. Iha parte seluk lezada kontinua konfirma faktus hotu iha akuzasaun no deklarata katak diak malu ona ho arguidu.

Alegasaun finál

Prokuradór haktuir katak bazeia ba konfisaun arguidu no deklarasaun lezada nian hatudu katak arguidu provadu komete krime hasoru lezada. Tanba ne'e prokuradór mantein nia akuzasaun hasoru arguidu no husu ba tribunál atu kondena arguidu tuir konviksaun tribunál nian.

Iha parte seluk defeza haktuir katak arguidu konfesa faktus hotu iha akuzasaun, arrepende ona nia hahalok, foin primeira-vez mai hatan iha tribunál no diak malu ona ho lezada. Tanba ne'e husu ba tribunál atu aplika pena ne'ebé justu ba arguidu.

Desizaun

Depoisde avalia faktu sira ne'ebe produs durante julgamentu, tribunál prova katak arguidu komete duni krime tuir faktu sira iha akuzasaun. Bazeia ba faktu provadu sira ne'e, tribunál konklui prosesu ne'e no kondena arguidu ho pena prizaun fulan tolu suspende ba tinan ida.

Ba informasaun liután bele kontaktu:

Luis de Oliveira Sampaio
Diretór Ezekutivu JSMP
Diresaun e-mail: luis@jsmp.tl
www.jsmp.tl